




宮闈典第一卷

宮闈總部彙考一

周

周制天子后立六宮三夫人九嬪二十七世婦八十一御妻以聽天下之內治外設小宰宮正宮伯
掌王宮之政令戒令及士庶子之在版者又有宮人掌王之內寢內宰以陰禮教六宮其內則九嬪
世婦女御女祝女史共宮中之職外又有典婦功典絲典枲掌女工之事內有司服縫人掌王后之
服外又有染人追師屨人共服飾之物皆統於天官冢宰此外春官又有世婦掌宮中之宿戒而內
宗外宗皆掌佐王后祠祭之事 按禮記曲禮天子有后有夫人有世婦有嬪有妻有妾 陳三夫
人九嬪二十七世婦八十一御妻自后而下皆三因而增其數妾之數未聞 大馬氏曰昏義古者
天子后立六宮三夫人九嬪二十七世婦八十一御妻以聽天下之內治此曰天子有后有夫人
有世婦有嬪有妻有妾蓋昏義言後宮之治故兼天子后言之而備六宮之數而妾不與焉曲禮
言後宮之位故止言天子而備六宮之名則雖后之尊亦曰有后而妾之賤亦與焉

月令仲冬之月命奄尹申宮令審門閭謹房室必重閉省婦事毋得淫雖有貴戚近習毋有不禁

陳註

重閉內外皆閉也減省婦人之事務順陰靜也淫謂女功之過巧者

昏義古者天子后立六宮三夫人九嬪二十七世婦八十一御妻以聽天下之內治以明章婦順故天下內和而家理天子立六官三公九卿二十七大夫八十一元士以聽天下之外治以明章天下之男教故外和而國治故曰天子聽男教后聽女順天子理陽道后治陰德天子聽外治后聽內職教順成俗外內和順國家理治此之謂盛德是故男教不修陽事不得適見於天日爲之食婦順不修陰事不得適見於天月爲之食是故日食則天子素服而修六官之職蕩天下之陽事月食則后素服而修六宮之職蕩天下之陰事故天子之與后猶日之與月陰之與陽蓋相須而后成者也天子修男教父道也后修女順母道也故曰天子之與后猶父之與母也故爲天王服斬衰服父之義也爲后服齊衰服母之義也

陳注

方氏曰六官天地四時之官也有六卿而又有九卿者兼三公數

之則謂之九卿由公至士其數三而倍之止於九者陽成於三而窮於九以其理陽道故其數如此后治陰德而其數亦如之者婦人從夫故也六宮謂大寢一小寢五也先言六宮而后言六官

者欲治其國先齊其家之義也

按周禮天官小宰之職掌建邦之宮刑以治王宮之政令凡宮之糾禁

訂義

鄭康成曰宮刑在宮中

者之刑建明布告之

鄭鐸曰考之於經不見宮刑之目蓋宮中之刑宜隱也觀王族有罪繫於

甸人而禮以謂刑於隱者不與國人慮兄弟則王宮之刑宜益加隱可知 王氏詳說曰凡者總

之辭凡宮則王宮后宮總在是矣

鄭康成曰糾猶割也察也

鄭鐸曰糾以察其隱匿禁以止

其干犯有內宰以憲禁令於北宮而糾其守矣小宰又建宮刑以治其糾禁其孰敢犯之哉 王

巖叟曰糾以約其慢怠禁以止其邪僻不惟邇臣知所畏而後宮近習亦知所畏此乃先王內治

之道 鄭鐸曰周官之制有王宮有后宮后宮則王之北宮王宮則路寢一小寢五是也至尊所

居欲其嚴肅必有刑禁以治其政令故使小宰建之然非特治王宮而已凡宮之糾禁皆得以治

之蓋欲治其國先齊其家人君雖正身以齊家苟不用刑以威之則或恃恩而無所畏然齊家用

刑則傷恩故使大臣馭之以刑也法在大臣恩在人主家其有不齊乎是刑之建宜使大宰今乃

使小宰者豈非大宰論道佐王所以正其身而掌刑以治糾禁近於有司之職非所以尊論道之

臣故歟然使大宰之貳掌之則察治者豈不尊且嚴哉 陳及之曰大宰於內外事無所不關預小宰宰夫是其屬官也天官中既有內宰下大夫治王內之政令矣權豈不足以統宮內而又俾小宰之屬預其事何也蓋自宰夫以下卽敘宮正宮伯二官宮正掌宮中徒役及諸官府在內者宮伯掌貴游子弟宿衛王宮者彼二官皆命士耳權輕不足以壓人望故又俾小宰宰夫總之若內宰特治王內之政令以禮儀教王后夫人及九嬪世婦耳而宮中徒役宿衛之事無所干預也漢制雖有周官遺意以衛尉掌兵衛如周官宮正之職以光祿勳掌郎從宿衛如周官宮伯之職而大司馬以三公都試郎羽林之屬凡兩宮地城門衛北軍兵屬焉近周制宮正宮伯之權統於小宰矣

宮正上士二人中士四人下士八人府二人史四人胥四人徒四十人

訂鄭康成曰正長也主宮

中官之長

掌王宮之戒令糾禁以時比宮中之官府次舍之衆寡爲之版以待夕擊柝而比之國有故則令宿其比亦如之

訂

鄭康成曰比校次其人之在否官府之在宮中者若膳夫玉府內宰內史之屬次

諸吏直宿若今部署諸廬者舍其所居寺也版其人之名籍待戒令及比也夕莫也莫行夜以比直宿者爲其有解情離部署王昭禹曰先王之於宿衛其比之也以時其待之也以版固已詳矣而又夕擊柝而比之以宿衛於王宮者宜致其嚴故也

辨外內而時禁

訂義

易氏曰王宮有內外自雉門內以至燕寢則爲內自雉門外以至外朝則爲外

稽其功緒糾其德行幾其出入均其稍食去其淫怠與其奇袤之民會其什伍而教之道藝月終則會其稍食歲終則會其行事凡邦之大事令于王宮之官府次舍無去守而聽政令春秋以木鐸脩火禁訂義史氏曰火星三月見於辰九月伏於戌脩火禁於宮中必待春秋順時令也

凡邦之事蹕宮中廟中則執燭

訂義

王昭禹曰蹕則以嚴於禁止爲事執燭則以明於照察爲事皆

衛至尊之道也史氏曰出入皆蹕禁馳驟而肅喧譁也祭則執燭禁昏晦而防不虞也

大喪則授廬舍辨其親疏貴賤之居

訂義

鄭康成曰廬倚廬舍墜室親者貴者居倚廬疏者賤者居

墜室

宮伯中士二人下士四人府一人史二人胥二人徒二十人掌王宮之士庶子凡在版者

訂義王嚴

叟曰天子以天下爲家守在四夷公卿大夫之子弟以天子爲家守在王宮或謂王宮以士庶子守之則可若虎賁氏在國亦守王宮司隸帥四夷之隸執其邦之兵亦守王宮何也不知自中門以至路門皆宮也而王宮之衛自分內外各有其人士庶子之守在路寢之內次舍之中虎賁翟隸不屬之宮伯此必在寢門外明矣

掌其政令行其秩序作其徒役之事授八次八舍之職事

訂義鄭康成曰衛王宮者必居四角四中

於徼候便也次其宿衛所在舍其休沐之處

若邦有大事作宮衆則令之月終則均秩歲終則均敘

訂義王氏曰秩酒秩膳之類日月有焉故月

終則均之勞逸劇易宜以歲時更焉故歲終則均之

以時頒其衣裘掌其誅賞

訂義鄭康成曰頒班布也衣裘若今賦冬夏衣也鄭伯謙曰宿衛之兵

有四居則有宮中之徒役公卿大夫士庶子以爲環列腹心之衛宮正宮伯所掌是也出則有虎士八百人掌先後王而趨以卒伍視朝則在路門之右若虎賁所掌是也奉輿馬督扈從視朝則在路門之左則有太僕以掌之執其兵器服其兵服以衛王門之外朝在野外則守內列則有司

隸以掌之所謂使其屬帥四夷之隸是也由是言之環列腹心之衛非兵衛在內而不出虎士之衛王不出亦不行四翟則以王之出而環衛諸門侍御僕從之役則以王之行而飭整駟從此宿衛之別也

宮人中士四人下士八人府二人史四人胥八人徒八十人

訂義

王昭禹曰宮官之屬有宮正宮伯

而又有宮人者蓋宮正掌王宮之戒令糾禁宮伯掌王宮之士庶子凡在版者是其所掌及於宮中之官府次舍宿衛之事而宮人之所掌則止於修治宮寢與凡共王勞襲之事而已

掌王之六寢之修

訂義

王氏曰王朝有三寢有六陰陽之義也

鄭康成曰六寢者路寢一小寢五

玉藻曰朝辨色始入君日出而視朝退適路寢聽政使人視大夫大夫退然後適小寢釋服是路寢以治小寢事以時燕息焉 王氏詳說曰王謂之六寢掌之者宮人后謂之六宮掌之者寺人宮人之職以中士四人爲之寺人之職以王之正內五人爲之鄭氏以正內爲路寢是已

爲其井匱除其不蠲去其惡臭

訂義

賈氏曰謂於宮中爲漏井以受穢又爲匱豬使四邊流水入焉

井匱二者皆所以除其不蠲潔又去其惡臭之物

共王之沐浴凡寢中之事埽除執燭共鑪炭凡勞事

訂義鄭康成曰勞事勞襲之事

四方之舍事亦如之

訂義史氏曰王巡狩而適四方必有次舍其所掌亦不外是居高明遠濁穢所

以養神明而清志慮也

內宰下大夫二人上士四人中士八人府四人史八人胥八人徒八十人

訂義鄭康成曰內宰宮中

官之長 王巖叟曰宮中官不過三項宮正宮伯宿衛之官今之環衛是也宮人掌王寢洒掃次舍之事今之修內司是也至於內宰凡宮中之奄豎與諸嬪御皆在所統則今之入內侍省都知是也其體甚大其官甚尊其長以下大夫其屬無下士可謂尊矣

掌書版圖之灋以治王內之政令

訂義鄭康成曰版謂宮中閤寺之屬及其子弟錄籍圖王及后世

子之宮中吏官府之形象 鄭鐸曰小宰所治之王宮乃王之六寢此所治之內宮蓋后夫人所

居之宮乃王之北宮

均其稍食分其人民以居之

訂義易氏曰鄭氏謂稍食爲吏之廩祿人民爲吏之子弟恐非吏與子

弟所得而至胡五峯疑官吏與妃嬪雜處以經考之自有明文秋官掌戮曰宮者使守內蓋王

內之職惟內小臣奄四人爲上士其餘皆非命士則知所謂宮者皆人民也以版圖之法治之如某所爲宮某所爲寢某所爲廬舍分以守之故曰分其人民

以陰禮教六宮

訂義

鄭司農曰陰禮婦人之禮

鄭鍔曰周制后有六宮猶王有六寢正宮一以聽

內事燕宮五以息燕其制以一宮爲中四宮處四角而正宮一則在前不名曰寢乃曰宮者蓋寢則息燕之義宮則隱蔽之言息燕非婦人所宜言而婦人以隱蔽爲自重故王謂之寢而后則名曰宮六宮者指后言之不曰王后而曰六宮不敢斥言王后之尊與王同體不斥言示訓也

以陰禮教九嬪

訂義

鄭鍔曰九嬪九人猶朝之九御經曰內有九室九嬪居之外有九室九卿朝焉

嬪居九室掌婦學之法以教九御祭祀則贊后賓客則從后所任爲尤重不知禮則上納王后於邪下帥九御爲非矣故亦以陰禮教之

以婦職之灋教九御使各有屬以作二事

訂義

鄭康成曰婦職謂織紵組紃縫線之事

杜子春曰

二事絲枲之事 王昭禹曰大宰以絲枲之職任嬪婦內宰以絲枲之事作九御蓋九御勤於絲之事則天下無不蠶者九御勤於枲之事則天下無不績者 鄭鍔曰說者謂周制天子六宮自

后而下有三夫人九嬪二十七世婦八十一御妻內宰宜皆在所教也獨教六宮教九嬪教九御上不及夫人下不及世婦何也蓋夫人猶王之三公坐而論道三夫人亦從論婦禮者三公不必備惟其人非明道者不可以處其位然不明婦禮豈可以處三夫人之職哉六宮之尊猶且教之則三夫人從可知矣嬪之爲賓也猶朝之九卿焉而婦則執婦道以事人者也於其尊而有賓道者猶且教之則世婦從可知矣

正其服禁其奇袞展其功緒

訂義

王氏詳說曰后六服夫人揄翟闕翟九嬪則鞠衣世婦則展衣女

御則緣衣此所謂正其服

大祭祀后裸獻則贊瑤爵亦如之

訂義

鄭鍔曰周制王后無祭天之事則大祭祀者祭宗廟也王

氏詳說曰王以圭瓚酌鬱鬯裸后以璋瓚酌鬱鬯裸王以玉爵酌醴齊朝獻后亦如之王以玉爵酌盎齊饋獻后亦如之若天后所酌瑤爵者謂羨尸時也蓋王之羨尸以玉爵酌醴齊后之羨尸以瑤爵酌盎齊是九獻之禮后與王之所以相爲異同也

正后之服位而詔其禮樂之儀

訂義

鄭鍔曰后之服六而祭祀之服所用不同祭各有位而后之位

所立各異如祭先王則當褱衣祭先公則當揄狄祭羣小祀則當闕狄是正其服也如君在昨則夫人在房君西酌犧象則夫人東酌鬯尊是正其位也

贊九嬪之禮事凡賓客之裸獻瑤爵皆贊

訂鄭康成曰謂王同姓及二王之後來朝覲爲賓客者

裸之禮亞王而禮賓獻謂王饗燕亞王獻賓也瑤爵亞王酬賓也坊記曰陽侯殺穆侯而竊其夫人故大享廢夫人之禮

致后之賓客之禮

訂鄭康成曰謂諸侯來朝覲及女賓之賓客

凡喪事佐后使治外內命婦正其服位

訂鄭康成曰使使其屬之上士內命婦謂九嬪世婦女御

鄭司農曰外命婦卿大夫之妻王命其夫后命其婦

凡建國佐后立市設其次置其敘正其肆陳其貨賄出其度量淳制祭之以陰禮

訂劉執中曰朝

以聽天下之政故君立之天道也市以聚四方之貨故后立之地道也禮庫曰周制國君夫人

世子命夫命婦過市皆有罰所以別朝市辨義利分貴賤今內宰却佐后立市市井之令出於房闈之中此漸不可長而況宮中之祕密却與市井之事其意果安在王巖叟曰此特體地道以

始立市耳既立則后何預其事 王氏詳說曰洛邑營於周公攝政之五年此書作於六年是朝
市之位已立矣何於此而復佐后立市乎是知此書周公作之爲天下後世法 王氏曰次其官
之次則司市所爲思次介次是也敘其地之敘司市所謂各於其地之敘是也肆謂陳物之肆肆
長所謂各掌其肆之政令是也 杜氏曰淳讀爲純純謂幅廣制謂疋長 鄭康成曰陰禮婦人
之祭禮

中春詔后帥外內命婦始蠶于北郊以爲祭服歲終則會內人之稍食稽其功事

訂義王氏曰內人

王內之人

佐后而受獻功者比其小大與其良醜而賞罰之

訂義王昭禹曰典婦以功獻於后內宰則佐后而

受之

會內宮之財用正歲均其稍食施其功事憲禁令于王之北宮而糾其守

訂義賈氏曰正歲建寅之

月 王氏曰稍食歲終既會之矣正歲又均焉功事歲終既稽之矣正歲又施焉 鄭康成曰北

宮后之六宮謂之北宮者繫於王言之明用王之禁令令之守宿衛者

上春詔王后帥六宮之人而生穰穰之種而獻之于王

訂

鄭康成曰六宮之人夫人以下分居后

之六宮者古者使后宮藏種以其有傳類蕃孳之祥必生而獻之示能育之使不傷敗且以佐王耕事共禘郊也

九嬪

訂

鄭康成曰嬪婦昏義曰古者天子后立六宮三夫人九嬪二十七世婦八十一御妻以聽

天下之內治以明章婦順故天下內和而家理不列夫人於此官者夫人之於后猶三公之於王坐而論婦禮無官職薛平仲曰周官言夫人多矣而夫人曾不列於官九嬪世婦女御又不言

其數三公固無官也嬪婦女御之以德進者不徒求以充位也內宰自內豎以上皆所以紀綱王宮之治而九嬪以下所以輔成王內之治者非法不立非人不行內外蓋一道所以敘次之別如此陳君舉曰婦人女子常與至尊幽居九重人弗得見驕蹇自恣無所不至故使之分職於六宮附屬於冢宰而天宮內宰春官世婦又得以參檢其事與夫婦妾賤人自相使令而無畏忌者不同矣漢高之戚夫人留侯曰骨肉之間雖臣等百人何益袁盎却慎夫人坐文帝怒說以人彘乃從使大臣得與內事其如是乎後世一女專恣而公卿附離之不暇尙何冢宰之能率

掌婦學之灋以教九御婦德婦言婦容婦功各帥其屬而以時御敘于王所

訂義

賈氏曰婦學之灋

謂婦人所學之灋所謂婦德婦言婦容婦功也

易氏曰內宰言其學之已成者故謂之陰禮九

嬪言其學之未成者故謂之婦職

王氏詳說曰內宰之教舉其要也九嬪之教致其詳也故以

婦學爲言

史氏曰九嬪受教於內宰謂之陰禮故能知內學之法法者規矩準繩也

鄭康成

曰九嬪以下九九而御於王所九嬪既習於庶事又備於從人之道是以教女御

劉執中曰一

曰婦德婦以柔順貞潔爲本而皆本於德二曰婦言者言其心之聲心懷溫柔則言溫柔心懷正

順則言正順三曰婦容者謂用禮以正其容也容見於身則動根於德德以正其心而禮以正其

容故能步武成於宮商動靜中於禮樂詩不云乎被之僮僮夙夜在公被之祁祁薄言還歸四曰

婦功功者德行之實有德行以飭其身而無功實以事其上雖有寵祿不足以自固矣故有宗廟

之祭祀籩豆之濯漑不可以不致其潔有王后之奉養膳羞之精雋不可以不盡其心有祭服之

元黃歲功之所施不可以不致其力有粢盛之饋食薦徹之贊佐不可以不盡其禮驕侈之習與

性俱成安知四事爲不可忽所以有賴於九嬪之教 鄭康成曰教各帥其屬者亦使九九相與

從於王所息之燕寢御猶進也勸也進勸王息亦相次序凡羣妃御見之法月與后妃其象也卑者宜先尊者宜後女御八十一人當九夕世婦二十七人當三夕九嬪九人當一夕三夫人當一夕后當一夕亦十五日而過云自聖後反之

反祭祀贊玉盥贊后薦徹豆籩

訂義鄭康成曰玉盥玉敦受黍稷器

若有賓客則從后大喪帥敘哭者亦如之

世婦

訂義

王昭禹曰執箕帚以事人者謂之婦記曰納女於天子備洒掃婦之事人有廣嗣之義故

謂之世婦

鄭節卿曰天宮世婦以廣嗣爲義春官世婦卿以掌女宮之宿戒名同而官異不得

不分內外

鄭康成曰不言數者君子不苟於色有婦德者充之無則闕

掌祭祀賓客喪紀之事帥女宮而濯概爲盥盛

訂義

賈氏曰祭祀黍稷春人春之饌人炊之故知此

世婦非春非炊是差擇也

鄭鐸曰所用之器則濯概以致潔所奉粢盛則差擇以致精先王之

置世婦豈徒奉左右以爲悅哉其所掌者重矣

及祭之日涖陳女宮之具凡內羞之物

訂義

鄭康成曰涖臨也內羞房中之羞

賈氏曰謂饌餌粉

古今圖書集成
養案少牢皆從房中而來

掌弔臨於卿大夫之喪

訂義

鄭康成曰王使往弔

賈氏曰案司服公卿大夫皆王親弔之此又使

世婦者蓋使世婦致禮物但弔是大名雖致禮亦名爲弔 王氏曰世婦視大夫故使弔臨於卿

大夫之喪

女御

訂義

鄭康成曰昏義所謂御妻御猶進也侍也

掌御敘於王之燕寢

訂義

劉執中曰九嬪云以時御敘者朔望尊卑之敘此言御敘於王之燕寢者

以九人長少爲敘

李氏曰女御掌敘於王之燕寢不使九嬪世婦掌之防上之專妬蓋女御官

卑不敢嫉妬自專則內無怨女子孫衆多

以歲時獻功事

訂義

王昭禹曰歲時者歲終之時典婦功所謂秋獻功是也 鄭康成曰絲枲成功

之事

凡祭祀贊世婦大喪掌沐浴后之喪持鬢

訂義

王氏曰后之喪持鬢者女御以蔽飾后爲事

從世婦而弔於卿大夫之喪

訂義

鄭康成曰從之數蓋如使者之介云